

## Transkription von Urkunde PAR 1373a

Ort, Datierung: Parchim, 1373-05-03

Signatur: Landeshauptarchiv Schwerin, Acta civitatis PAR 54

Inhalt: Belehnung

In ghodes namen Amen . Wÿ Johan van ghodes gnaden here tû werle be kennen vnde be thûghen openbare in desseme ieghenwardeghen / breue . Dat wÿ myd willen . vnde na rade vnzes truwen rades . man vnde stede . hebben ghe laten Vnde gheuen . her ludeken ? / pren ? prestere . Vnde der erliken vrowen ghesen de heÿne bercowen wif hadde wesen tÿ parchim . deme ghod gnedich sÿ . den eÿghen/dom ouer dat hus vnde den hof de to deme huse licht in der stat tÿ parchim . dat den vamme lobeke hord hadde . Dat de marscal het / Bÿ deme vicarien huse van deme hilghengheÿste . Dorh sunderliker gnade . Vnde denestes willen . den vns de vorbenomede her lu/deke eÿne Vakene vnde vele ghe dan heft . Vnde hebben en ok an deme sulûen huse vnde houe allen borch denest . vnde bur denst / Vnde alle andere plicht . Vnde vnplicht . vrig quid leddich vnde los laten vnde gheuen . de vns vnde vnzen eruen edder ammetlude(n) / edder vnzen nakomelinghen van deme huse vnde houe van herscop weghene vnde van rechte tÿ boren mach . Vnde van den ratlude(n) / der stat tÿ parchÿm scotes wake vnde aller anderer stades plicht vnde vnplicht . quid leddich vnde los scolten wesen . Ock gheue wÿ / vnde laten deme vorbenomeden her ludeken vnde der vrowen . dat se dat hus vnde hof moghen lecghen tÿ eÿme ghestliken lene . also / tû eÿner vicarige edder tû twen . Edder tû vor kopende tû vor gheuende . eÿn istlik sine helfte edder beÿde tû samende . Mede tû dûnde / vnde latende wes em euent tû eÿme rechten erue vrig ewichliken tû be sittende . Sunder alle be wernisse . vnde hinder vnser edd(er) / vnzer eruen edder nakomelinghe . edder gemendes mid rechte edder mid vreuete . Edder weme se na zÿck dat gheuen vor kopen edd(er) / laten . bÿ alder vrigheÿt . also vorecreuen steÿt ghentzliken tû bliuende . Vppe dat vnze vor screuene gnade . ghaue vnde latinghe / van vns . edder van vnzen eruen edder nakomelinghen nu(m)mer wedder sproken werde . edder broken . so hebbe wÿ vnze grote in/ghzeghel vor dessen bref henghen laten . witliken vnde myd ghuden wÿllen . Desse bref is ghe gheuen vnde screuen tû deme hok/berghe ? Na ghodes bord Drutteÿnhundert iar . In deme dre vnde seuenteghesten iare In deme sunnauende vor mydvasten . Tughe ? / vnzer ghaue . vnde latinghe sint desse erbaren vrowen lude . Johan van gralow(e) ridd(ere) ? her hinrick van plawe vnze kentzeler . hinrick cassow(e) borghermest(ere) tÿ parchim . vnde vele mer erbarer lude de truwe vnde louen werdich sint